



勝槩小叙

陶元亮持盃澹遠溫然陶然



蓋得物

外之趣而意不在醉也夫必繇觥
而益盎而甕而池牛飲井眠醉則有
之趣云寡矣會心山水者亦若是遠
逾離合別有相眎而笑之趣故率爾

成聲悠然得句山光潭影恍惚飛來
此境此情故非漁人樵子所能數其
晨夕也余理姑四年與此中山水風
雨晦明行吟嚮奮氣來神運莫送於
心行捨去山水難移勝情可借
彼名賢之篇章收拾山川之勝韻恐

銓次不倫罍漏之譏在所不免然而
選勝正如論交不濫不苛取夫性之
所近而止高人韻士明璫寶璐與粗
服亂頭雜然雜坐亦殊有濠濮間想
要不愧古人所云身到處莫放過耳
採菊東籬下悠然見南山此真山水



缺卷1

之神交也。不求甚解，斯真耳。誰謂
元亮而游於酒人乎？我思古人寔獲
我心。

張萬選題



太平三書卷之二

濟南張萬選舉之甫編輯



長樂郡
張萬選
印

當塗勝槩一集

游山

謝朓

託養因支離乘閒逐疲蹇語默良未尋得喪云誰辯
幸蒞山水都復值清冬緬凌厓必千仞尋谿將萬轉
堅嶠既峻嶒迴流復宛澶杳杳雲竇深淵淵石溜淺
傍眺鬱篔簹還望森柗榭荒隩被葳莎崩壁帶苔蘚

鼯狖叫層巖鷗鳧戲沙衍觸賞聊自觀卽趣咸已展
經目惜所遇前路欣方踐無言蕙草歇畱垣芳可攀
尚子時未歸邴生思自免永志昔所欽勝迹今能選
寄言賞心客得性良爲善

治宅

人圖書

前人

結宇夕陰街荒幽橫九曲迢遞南川陽迤邐西山足
闕館臨秋風敞窗望寒旭風破池中荷霜翦江南棊
旣無東都金且稅東臯粟

游後園賦

前人

積芳兮選木幽蘭兮翠竹上蕪蕪兮蔭景下田田兮
被谷左蕙畹兮彌望右芝原兮寫目山霞起而削成
水積明以經復於是敞風闥之藹藹聳雲館之迢迢
周步檐以升降對玉堂之沈寥追夏德之方暮望秋
清之始飆藉宴私而遊衍時語語而逍遙爾乃日栖
榆柳霞照夕陽孤蟬已散去鳥成行惠風湛兮帷殿
肅清陰起兮池館涼陳象設兮以玉璵披蘭籍兮咀

桂槩仰徽塵兮美無度奉英軌兮式如璋籍高文兮
清談預含毫兮握芳則觀海兮爲富乃游聖兮知芳

游謝氏山亭

李白

淪老卧江海再歡天地清病聞久寂寞歲物徒芬榮
借君西池遊聊以散我情掃雪松下去捫蘿石道行
謝公池塘上春草颯已生花枝拂人來山鳥向我鳴
田家有美酒落日與之傾醉罷弄歸月遙欣穉子迎

謝公宅

前人

青山日將暝寂寞謝公宅竹裏無人聲池中虛月白
荒庭衰草徧廢井蒼苔積惟有清風閒時時起泉石

題青山館

許渾

昔人詩酒地芳草思王孫白水半塘岸青山橫郭門
懸崖碑已折盤石井猶存無處繼行樂野花空一樽

謝亭送別

前人

勞歌一曲解行舟紅葉青山水急流日暮酒醒人已
遠滿天風雨下西樓

宿青山館

許棠

下馬青山下無言有所思
雲藏李白墓苔暗謝公詩
烈燒飛荒野棲鳧宿廣陂
東來與西去皆是不閒時

青山晚眺

前人

昔人懷感處此地倍魂消
四海經搖落三吳正寂寥
風移殘燒遠帆帶夕陽
遙欲繼前賢跡誰能似隱招

發青山館

趙嘏

鳧鷖聲煖野塘春鞍馬風高驛路塵
一宿青山又須去
去古來難得是閒人

送郭功甫還青山

梅堯臣

來何遲遲去向勇羸馬寒僮肩竦竦
昨日棄爲梅福官扁舟早勝大夫種
負經不厭關山遙訪我猶將歲月恐
得言會意若秋鷹反翅歸飛輕飽飭
明朝到家年始開椒花壽酒期親捧
何當交臂須強行莫作區區事丘壠

青山道

文同

冥冥青山道叢木含古烟遠客事行役未晚不敢前
乳虎正養子采食大路邊但顧已所急其誰辨愚賢

謝公山

吳淵

碧嶂千尋鎮一州十年前已作斯游因看紅杏行停
轡爲濯清泉坐解裘怪石巉巖蹲虎豹老松偃蹇卧
龍虬轉高轉有無窮景杖履何妨絕頂頭

風流千載憶玄暉爲此登臨不覺疲看得眼前都是
句如何身後不傳詩須知小隱徜徉日正是高翔濠
汰時可惜出山終不免空畱翠岫與清漪

謝家山

黃鎮成

結廬在南田已辭城郭謹山水未幽深擬謀泉石間
野父導我行同登謝家山緣溪入深窈絕磴窮躋攀
憑虛橫鳥道高回白雲關下瞰飛瀑流倚杖聽潺湲
良疇忽衍曠陽坡冬不寒盤旋得幽谷外密仍中寬
松根有茯苓竹本易成竿願與同心人築茅棲烟巒
去市十里許塵坌未能干食力終無慚傲然身世安

謝朓青山

曹學佺

玄暉抱逸韻此曲千古稀
朝解宣城郡暮掩青山扉
其志則如是而乃時命非
自簪招隱士惆悵在翠微

青山懷古

唐公靖

一片巉巖列翠屏湖光萬頃入青冥
宣城內史歸何處猶賸蒼烟護客星

青山尋謝玄暉舊居

梅守箕

徂雨發京邑徘徊青山道
白雲護叢林峻嶽疎野草
古笈有佳士翛然竟幽討
爽氣延中阿寔維心所好
歲月第遷斥遺迹忽已藐
人生會有時江流漫浩浩

青山尋謝宣城故宅

梅鼎祚

不妨微雨繫孤槎且向青山問謝家
三徑春風歸燕雀一江秋水上蒹葭
夢中渴憶如瓊樹句裏長飛似綺霞
故郡可憐祠廟在臨流吾欲采蘋花

青山

馬之駿

秋光頻洗勝情催謝宅唐碑半草萊
帶藻人肩絲網

去採菱女渡木罌來鳥邊落葉時同下雁後餘花獨
淺開盡把圖經驗詞賦古今山水重時來

夜登采石獻從叔當塗宰陽冰 李白

金鏡霾六國亾新亂天經焉知高光起自有羽翼生
蕭曹安峴岿耿賈摧欃槍吾家有季父傑出聖代英
雖無三台位不惜四豪名激昂風雲氣終協龍虎精
弱冠燕趙來賢彥多逢迎魯連善談笑季布折公卿
遙知禮數絕常恐不合并惕想結宵夢素心久已冥

顧慙青雲器謬奉玉樽傾山陽五百年滌水忽所榮
高歌振林木大笑喧雷霆落筆灑篆文崩雲使人驚
吐辭文炳煥五色羅華星秀句滿江國高才揆天庭
宰邑艱難時浮雲空古城居人若薙草掃地無纖莖
惠澤及飛走農夫盡歸耕廣漢水萬里長流玉琴聲
雅頌播吳越還如太階平小子別金陵來自白下亭
羣鳳憐客鳥差池相哀鳴各拔五色毛意重太山輕
贈微所費廣斗水澆長鯨彈劍歌苦寒嚴風起前楹

月銜天門曉霜落牛渚清長歎卽歸路臨川空屏營

采石山

林逋

危閣閒登日漸曛畫屏晴雨枕江濱秋稜瘦出無多
寺古翠濃連一半雲坐卧不拋輪釣叟往來長見屬
鷗羣翻然却怪宣城守是甚將移李白墳

采石磯

賀鑄

東西采石磯山水兩清絕漁舸與商舶今古幾沿越
飄飄翰林主長嘯弄明月難訪物外遊飛雲渺天末

采石

曾極

石琢浮圖枕水濱興亡歲久已成塵長江靜夜蘆花
川只傍牽絲發棹人

采石磯

林鴻

斷磯縹緲駕危亭欄檻孤高見杳冥牛渚春濤通海
白溧陽烟樹入淮青騎鯨夜憶遊仙月泛鷁春浮奉
使星萬古憑高一回首玉壺清酒莫教醒

采石

王世貞

玄暉旣邁往李白時一振請看滄江流萬古才不盡

宿采石

唐公靖

江湖堪寄跡飄泊孝廉船網集桃花岸鶯啼楊柳天
百篇傾酒盡一覺抱雲眠捉月人千古騎鯨去未還

經采石

傅與礪

未明發蕪湖終飯次采石大江天同瀉巨浪山與敵
松寒蒼虬姿崖古老鐵色其傍有仙塚云是李太白
生爲長庚星歿爲大塊跡因思開元中出入蒙帝澤

御羹白瑤杯宮研青玉滴恩榮日深重意氣何赫奕
酣歌太華小豪飲渤澥窄頗聞宮中怒遂有天上謫
殷亂微子行楚昏屈原斥嗟哉唐家帝同姓逝安適
何年爲茲遊千載但故跡騎鯨信縹緲捉月詎昏惑
得非厭塵羈無乃達寄客翻然委之去富貴何足惜
杜陵平生友夢寐頻見憶白骨焉所求青山亦岑寂
相去嗟已遠令人心悲塞舉杯欲酌之帆去招不得

過采石

高啓

山暝斷磯頭猿聲兩岸愁柳間娼女酒月下估人舟
擒虎嗟橫渡騎鯨憶醉遊停橈正懷古風急葦花秋

過采石

管 訥

水急灘難上行行欲曙天人家多賣酒客路暫停船
采石荒祠下黃山古塔邊經過人易老搔首一茫然

泊采石

王 佑

清夜宿采石浩歌懷謫仙海風吹明月飛上青天懸
月光宛如昨太白久不作呼酒坐船頭邀月共斟酌

大江如平天倒看明鏡圓水上皆白雪流光入余船
當時豈真醉捉月猶兒戲千載笑疎狂幾人會高致
我今問嫦娥百歲愁常多古月至今好今人如古何
謫仙倘遇之便好同樽酒明月成三人相逢足爲友
期君君不來輕棹酒船迴但得天上月長在掌中杯
重過采石

湯顯祖

夕陽千里弄舟還一片秋聲兩岸山醉着錦袍如夢
杳月明何限水雲間

過采石

湯賓尹

維舟暫寄渚之陽
天翠長飛插兩梁
溪側就江寬
沐浴山危畱石鬪
昂藏長林松老堪
封爵靜夜魚游擬
上堂闢古鎮今多氣象
可容此地得徉狂
如此風波不可行
旋依李白看江橫
乾林挾怒頻呼
雨伏怪乘騎亦射睛
在擾得閒靜者思
扶人無咎長年情
密韜榜楫安高卧
濶展觥罍息去程
蓬底乍須龜作枕
磯頭聊以蚌爲城
浮家泛宅亦云足
萬歲千秋空復聲
山水之權託于隱
神明所住保無兵
他年置我老松下
陰霽浮沈始得平

望采石磯

吳伯與

寒江如一帶
片石數峰長
岸草迎霜白
蘆枝壓浪黃
清平千載調
李白半生狂
詩有餘師在
吾因一吊湘

采石江

陳萬鈞

江煙霏霏江月黑
寒光照耀玻璃色
當年江上錦袍人
騎鯨一去無消息
天生此境絕險難
驚湍九道奔

空山今宵波平浪如砥舟行恍若圖書間欲問焮犀
是何處漁父鳴榔隔烟霧羨渠鷗鷺獨忘機占盡滄
浪自來去

曉發采石

詹沂

霞捧初升海日晨光尚爾凝煙吹徹泠泠笙管人乘
天上樓船

風起波紋生細一帆曉帶江雲北望神京千里九重
紫氣氤氳

采石磯泛月

梅守箕

載酒且行歌悲風江介多未秋雲亦冷入夜月能波
愁鳥啼貞穴幽人衣女蘿蕭條芳草色不醉復如何
月夜自采石渡江

梅鼎祚

天豁大江流乘宵擊楫遊濤聲喧萬馬石影動雙虬
疊鼓疎星曉長歌片月秋余將問海若指點一浮漚

舟泊采石

唐允甲

乳燕春歸綠未平帆飛雪浪卧吹笙江山好處畱歌

太平三書 卷之二
咏風雨經年半甲兵隔浦魚燈雲共濕疎林螢火月
空明蛾眉亭畔青青艸孤塚荒臺萬古情

采石潮聲

陳棖

傳聞仙客此騎鯨萬古東流恨未平乍逐微風來柳
岸更隨急雨撼江城磯頭魚榜千聲合天際蛾眉一
抹橫薄暮維舟聽不盡覽奇弔古重合情

采石懷古

梅堯臣

青峰來合沓勢壓大江雄舟渡神兵後城荒王氣空
山根魚浪白巖壁石蘿紅弄月人何在孤墳細草中

采石述懷

胡廣

我生厭局促江海日奔馳扁舟薄暮過采石仙人招
我登蛾眉亭前波浩渺百尺懸崖俯飛鳥三山
潮到浪欲平明月來時漾珠小錦袍公子李謫仙騎
鯨一去經千年作詩往有三百篇上追風雅相流傳
却向此中看月色翻身跳入龍宮眠纖塵不染骨已
蛻空餘荒塚埋雲烟便呼斗酒酹江水再起共乘墳

下船將攜兩童歌扣舷玉簫吹斷催繁絃世上黃金
不如土取醉何如斗十千悠然懷古怨莫極留得青
山舊相識傍人訝我酒家仙亦有從前好詩癖夜闌
慷慨曲未終起舞拂袖來江風朝雞促報東方曙放
手但覺金罇空君不見摩挲銅狄徒搔首今古英雄
歸一朽虛名落在宇宙間惟有文章可長久

采石懷太白

薩都刺

夢斷金雞萬里天醉揮毫筆掃蠻箋錦袍日進酒一
斗采石江空月滿船金馬重門天似海青山荒塚夜
如年祇因丰骨蛾眉妒不作天仙作水仙

重修采石太白祠碑

汪道昆

夫稱詩莫盛于唐唐詩莫盛于太白采石故有特祠
祠太白則太白以采石終焉高皇帝都金陵去采石
不百里于時釐正祀典黜諸不經而采石祠事獨存
則以其人存也唐制以詩論士自天子以至衆庶莫
不稱詩其以詩鳴者無慮百家自朝廷宮掖以至州

里丘間莫不亟稱太白其後躋子美于壇坫互爲桓
文則以太白翩翩負凌雲之氣謂之仙才子美深造
而默成命方員而中規矩謂之詩聖分部而出率爲
三駕先鳴九合之師勿恤左次顧子美雅以無敵負
太白太白猶然姍笑之美言中窾放言中權空必有
以也當時自賀監而下與國同盟若在葵丘則齊爲
政昌黎以興文命世必避李杜先登雖有宋急經術
而緩聲歌終不以其故而貶太白明設科浴宋制緩
急與同弘正之間其詩唐矣嘉靖初載論道者務棲
於心卽辭之工不雕蟲則刻斲耳彼已師門相望尸
祝相乘直將役屈宋而僕鄒枚于李杜何有今天子
務求二帝三王大經大法壹稟于中庸暇日課文學
侍從之臣同歸雅頌貌言雖華必覈其實眇論雖詭
不吊而亟屏之凡諸絃誦之室俎豆之庭責在有司
非令甲者必毀由內及外則首善先焉直指使者定
遠張公按部南國由當塗歷采石攬轡而登太白祠

則以使者務觀民風必自聲詩始蓋風爲詩首而太白以古風擅場乃今祠不治則荒風不流則闕觀風者事也乃屬郡守相林君某主計羅君某陳君某張君某相與協謀當塗令楊君某受其成某某董其役徒取諸授糈費取諸贖金工不踰年乃告成事直指公介二千石屬余爲太白祠碑余惟太白以任放終身語載稗史其人故孰不死之術其斯爲委蛻也與哉而書傳墓碑皆云病卒語其常也藉令自託于酒入馮河無悔直指公必有概于中矣惡用履其地新其祠爲顧余孤陋寡聞亦嘗得其軼事夫人主之尊如天也其威如雷霆其不測如風如電臣下鞠躬擊拳雖敏者無所措手足躡嚙屏息雖辨有口無能出一辭乃若寵人御士據要害于喉舌心膂之間恣已愛憎權傾威福雖有法家拂士鮮不折節下之兩端云何其分絕則其體尊其迹親則其勢重故也白以布衣應召玄宗降輦步迎甚者授七寶牀饋方丈食

亡論已乃若承宣被酒扶掖登舟草嚇蠻書則貴妃
力士爲之供役賦清平調則千載而下爲之伏膺夫
非巍巍者邪夫非赫赫者邪一何藐也尋以脇從連
坐出九死而迸殊方蓬累自如視夜郎猶采地耳子
美同于遇主恒自足于榆枋及其避地三川依人轉
徙卑栖待哺不異鷓鴣狼云憂國憂民許身稷契浸
假而當一官授一事卽啁啾奚益焉其一嚶嚶其一
戚戚相與絜量廣狹豈曰能賢老氏之言曰得之若
驚失之若驚吾嘗聞儒行於仲尼則曰得之自是不
得自是驚則寵辱至矣自是而兩忘太白生平不讀
非聖之書庶幾乎冥合于先聖彼直以玄同爲口實
抑或寓言太白故蜀人于直指公爲鄉先正直指公
方以文學飾吏治所部斐然嚮風當世惟祠事爲祈
祈而直指公獨與二千石更始此其慷慨激發蓋亦
太白之遺風乎天寶中授白翰林供奉代宗卽位拜
左拾遺翰林學士時白已亾題祠以字而不以官則

其字顯矣

讀謫仙集

孫慎行

太白非雄于詩者也其吞吐天地笑傲今古直以詩寄耳卽詩以爲沿齊梁體亦非也上遡軒黃下逮莊列大多清虛物外卽他慷慨激烈所引魯連四豪時洩其牢騷不平之致儲才之富命物之芳託興之潔又絕類離騷遠遊招魂諸篇至迫狹人世騎鯨逞志卽汨羅彭咸寔欲見諸行事世皆知杜子美之愛君憂國有三百之遺而不知太白之愛君憂國更復不減其渴仰浩然止以爲迷花不事君其清平調宮詞烏棲等曲蓋皆以詩爲諫者也故其言曰大雅久不作吾衰竟誰陳王風萎蔓草戰國多荆榛嗚呼此豈漢魏以下諸人所可方駕者哉且唐之社稷賴汾陽復完汾陽品格初非太白不能識垂死非太白不能宥卽愛君憂國亦非太白有其志寔有其功矣生平慕青門黃石之風每每自稱酒仙又稱金粟後身人

不以爲誕傲余自童稚十二三歲間聞騎鯨事則欣然奮袂欲往以爲丈夫在世終不能嗾伊嚙爲死生戀戀態後科舉沉淪汨沒流俗者數十年矣卽集常設案漫爾一過無異爰居之駭鍾鼓也頃乃林居無事杜門經月不出又自顧顛毛種種仙凡異局悵念久之春風細雨草長鶯啼長歌數章不勝蛩足之思蟬脫之想天啓三年春仲十日書碑謫仙樓下

采石磯弔李太白

梁辰魚

停橈磯下奠椒觴艸木猶聞翰墨香飛燕已辭青瑣闥長鯨自上白雲鄉他年有夢遊天姥此夕無魂到夜郎西望長安漫惆悵金鑾春殿最荒涼

采石吊李太白賦

梅守箕

謁策不遇兮南征始還解徘徊兮于江之干顧見丘阜兮宿莽荒蕪曰李先生兮爰息此墳浪然下拜兮游寢接魂才畸命索兮離狂魄以自殉旣云見日兮孰煬竈之光熒鼎當舉而革兮劍在御而不陳踵寺

豎以資禍兮因女詭而介讒昔長門之怨諷兮眷衰
賤而重珍若清平之麗美兮戾盛寵而見賓道之遘
如今寧遠跡於等倫浮江濟漢兮吾土言遵幸投荒
而有骨兮姑以息耳沛顛旣游於川兮亦齋于其陵
登高必賦兮倡冷音于紫氛麗彼纍之潛靈兮屹千
秋而若新儀殘碣而紆懷兮恍山阿之有人俯江光
之隱顯兮席怪石之砒磷意宜照之多物兮龍罔象
其亦驚亮奇蹟之未冥兮聊寄訊于遙津子旅于而
無宅兮余浪漫而阻艱非並世而接踵兮猶河上祀
同憐算之之而其可兮罔厥適而匪愆氣飲曠而不
吐兮愁費鬱其來煎雖沈酒而尚戚兮奚濡首而足
耽先生其旣已超邁兮何以解余心之不然

采石弔李供奉

梅鼎祚

念君不得意漂泊在宣州雄賦千人失荒祠百代留
西風薦蘋藻零露濕松楸今古長遊地寒江日夜流

采石謁太白祠

釋洪恩

乾坤空故壘樓閣壯新祠雅道存今日風儀想昔時
秋山橫采石江月吐蛾眉一慨中流事清霜萬木悲
過采石賦得澄江淨如練
林兆珂

秋水明遠空滄江行超忽停策憇陰標揚帆采石髮
雲散天鏡澄風斂浪華歇汀鷺絕寒聲沙鷗恣浮沒
蕩漾襯霞光瀟爽清人骨卧郡有玄暉雲山俱秀發
染翰落芳洲披襟藉林樾歡宴未及終惆悵望京闕
笑我乏高符一麾守東粵慷慨懷古人沉思謝勳伐
借問銅柱銘何如敬亭碣豈必歎滯滯把酒陶嘉月
飲采石太白樓同劉元弢
吳伯與

名賢去不歸千古只荒閣冬山况欲睡滅滅空零落
一髮渺長江蛾眉驚峭嶠神魚怒欲鼓游龍驕自攫
我來酌椒醕雙栢下烏雀憶簪金鑿殿朝朝侍宴樂
烏棲曲欲罷清平調間作一朝羣小忤抽身向林壑
騷壇是主盟麴部當官爵文字熬人氣運微許身高
潔心空諾客囊水冷儼如今糟丘狐兔都非昨嗚呼

魚目從來妒轅駒空自縛劉君白也儔吊古意恢廓
悠哉予有懷聊向烟霞托丈夫明晦自有時所貴達
人善斟酌

早秋過采石慈湖

章嘉楨

江南極北地夏盡及秋時驛樹金陵道天門水戰旗
沙平朝露白野濶夕陽遲坐石絺衣挂青天月半規

謫仙樓

周權

大羅仙子李太白秋水疎蓮浮玉色一來金馬玉堂
中詩酒猖狂天子客飄飄豪氣秋風起登樓曾醉山
東市放浪形骸宮錦袍榮華富貴東流水酒酣揮灑
翻河筆險語能令鬼神泣至今光焰照塵寰一字堪
償雙白璧我來懷古空悽忡閉門偃卧甘詩窮瓣香
未展師道敬攜琴壺出杉蘿中問公何日作霖雨只
把文章事明主願恢斯道澤斯民奕奕光華照千古

謫仙樓

丘濬

蛾眉亭下弔詩魂千古才名世共聞江上波濤生德

色磯頭草木帶餘醺光爭日月常如在思入風雲迥
不羣岸芷汀蘭無限意臨風三復楚騷文

謫仙樓

費宏

星斗羅心骨珠璣爲肺腑塵寰六十年清風一萬古
謫仙樓

王問

崔嵬石上有僊樓樓下深江深不流興慶歌殘金雀
冷夜郎人去嶺猿愁天寒月小黃山渚水落沙明白
鷺洲悵憶當年畱勝事醉披宮錦下蘭舟

曾聞彩筆動龍顏碧海鯨飛去不還空有荒祠羞臘
日獨畱高詠在人間秋風樹裏玄猿嘯夜月磯頭石
蘚斑久矣吾衰虛大雅祇令揮涕憶青山

謫仙樓

徐中行

乘風獨上謫仙樓檻外滄茫散九州揮手雲霄辭萬
乘啣杯天地失千秋詩留大嶽星辰拆氣壓寒濤日
夜流我欲呼君醉明月蕭條異代不勝愁

謫仙樓

吳國倫

何處爇犀浦飄飄采石東春蘋依渚亂午浪觸山空
指點虛陳迹登臨自古風猶憐宮錦泛不與布衣同

謫仙樓

歐大任

狂歌采石月高卧謫仙樓珠斗當窓見銀河拂檻流
朔鴻飄塞色羌笛入邊愁何處思公子蛾眉夜夜愁

謫仙樓

章嘉禎

使君銜命去翩翩把酒憑高思黯然日下千帆來樹
杪沙邊萬井合風烟星寒劍氣尊前發春入梅花笛
裏傳痛飲莫辭今夕醉河山明日邈誰憐

謫仙樓

沈明臣

采石江頭月光射青天無波水如拭舉杯一酌錦袍
入月欲無光水將黑高才任俠凌賢豪海嶽可傾天
子識一被讒言謫夜郎歸來故人頗相憶當塗賢宰
意氣多楚江釀作金尊波臨風醉騎赤鯉去捉月其
如玉兔何玉兔不可捉赤鯉何年歸芳名不逐黃泉
去信有精靈白日飛卽今明月江心墜白鷺空洲我

空醉我欲問月月不言一片青天下雙淚

謫仙樓

王寅

帆落東風爲舊蹤蘇門嘯響倚杉松長江鏡面秋磨
淨雙峽蛾眉晚畫濃繡壁蘚花無鳥啄巡簷蘿葉有
雲封移舟繫在禪宮下來聽西遊一夜鐘

謫仙樓

王士性

疊嶂若雲屯蜃氣滿江臬浮煙落天門千里翻波濤
伊昔李青蓮輕舟汎宮袍扣舷欲無人對酒成吾曹
斗酒自淋漓眼花興益豪騎鯨去不返海濶天宇高
茫茫此碧落百代沉風騷酌君一樽酒江水日滔滔

謫仙樓

曹學佺

采石江山自今古青蓮居士長爲侶浩氣當年朝太
清雄文早歲誇明主明主難禁翠黛羞華清無意白
雲浮在天爲星不免謫落地爲人復遠流東流之水
何時歇太白高名猶突兀好似蔭人嶺上松更堪醉
爾波間月八月江風颯颯秋客來牛渚磯上遊長江

風利不肯去寒林月黑依然留冥濛江上雨瀟瀟江
月無光嘆寂寥照君顏色不可見使我心魂黯自銷
如何君歸夜郎道祇戀江南風物好武陵溪水空桃
花丹丘石門怨芳草江邊一一弔夫君直望青山有
古墳謾道埋君在此山精靈常懸天地間

謫仙樓

張一儒

僊人原自住瑤京磯上高樓卽五城雜樹尚畱宮錦
艷長江猶似酒杯清空山鳥語春風過遠浦帆歸夜
月生碑碣滿庭詩滿屋誰將騷雅託同聲

至牛渚

王僧孺

楓林曖似畫沙岼淨如掃空籠望懸石回斜見危島
綠草閑遊蜂青葭集輕鶻徘徊洞初月浸淫潰春潦
非願歲物華徒用風光好

夜泊牛渚趨駱八不及

孟浩然

星羅牛渚夕風退鷁舟遲浦淑常同宿烟波忽間之
棹歌空裏失船火望中疑明發泛滄海茫茫何處期

太平三書 卷之二
牛渚雜興

李頎

沈沈牛渚磯舊說多靈怪行行夜乘生犀燭洞照洪
深闢澎湃乘車駕馬往復旋赤紱朱冠何偉然波驚
湧若潛幽石龍抱胡髯卧黑泉水濱丈人曾有語物
或惡之當害汝武昌妖夢果爲災百代英威埋鬼府
青青蘭艾本殊香察見泉魚固不祥濟水自清河自
濁周公大聖接輿狂千年魑魅逢華表九日茱萸作
佩囊善惡死生齊一貫祗應斗酒任蒼蒼

牛渚磯

人圖畫

李白

絕壁臨巨川連峰勢相向亂石流湫間迴波自成浪
但驚羣木秀莫測精靈狀更聽猿夜啼憂心醉江上
秋夜泊牛渚懷古

前人

牛渚西江夜青天無片雲登舟望秋月空憶謝將軍
余亦能高詠斯人不可聞明朝洞庭去楓葉落紛紛
送羅少府歸牛渚

賈島

巨川滙牛渚下有淵靈宅絕壁俯層巖迴波自撞激

不見爨犀人空憶騎鯨客泊舟陟危亭蛾眉望中碧
作尉長安始三日忽思牛渚夢天臺楚山遠色獨歸
去灞水空流相送回霜覆鶴身松子落月分螢影石
房開白雲多處應頻到寒澗泠泠漱古苔

牛渚夜泊

崔塗

烟老石磯平袁郎夜泛情數吟人不遇千古月空明
人事年年別春潮日日生無因逢謝尚風物自凄清
下更有朱衣躍馬人

詠牛渚

胡曾

牛渚歌

宗臣

采石磯頭問牛渚渚上虬螭作人語賣鮓歲歲泣鮫
人弄珠夜夜悲龍女太真一去雲離離至今秋色天
門垂我行亦有赤犀在明月照君君不知

牛渚磯

張京

神物伏巖岑赤文護至今探奇須道力用晦是靈心

帆集千檐瓦濤迴百戰音來遊記石壁刻畫借瑤簪

蛾眉亭

高九萬

千尺懸崖巨浪撞危亭高峙對微茫遠峰凝黛雙蛾
淡流水連雲一帶長日落江容難可畫天寒山色不
成粧停舟試放登臨眼北望青煙欲斷腸

蛾眉亭

趙孟頫

天門日湧大江來牛渚風生萬壑哀青眼故人攜酒
共兩眉今日爲君開蒼崖直下蛟龍吼白浪橫空鵝
鸛迴南眺青山懷李白沙頭官渡苦相催

賦得蛾眉亭送胡長史粹中之楚

貢性之

雙蛾橫翠黛孤亭枕江流伊人適行邁於焉拽蘭舟
山空夕烟歛月白水光浮永懷謫仙人浩歌動清秋
賦得蛾眉亭送王得常御史赴南臺

余闕

江亭望華嶠望望似修眉掃黛偏能巧含顰知爲誰

娟娟微雨裏脉脉夕陽時千里乘驄去因之傷別離

蛾眉亭

前人

空亭瞰牛渚高高凌紫氛澄江萬里至翠屋兩眉分
落日兼霞綵流光成綺文憑軒引蘭酌休憶謝將軍

唐化城寺鍾銘

并序

李白

噫天以震雷鼓羣動佛以鴻鐘驚大夢而能發揮沉
潛開覺茫蠢則鐘之取象其義博哉夫揚音大千所
以清貞心驚俗慮協嚮廣樂所以達元氣彰天聲銘
勲皇宮所以旌豐功昭茂德莫不配美金鼎增輝寶
坊仍事作制豈徒然也粵有唐宣城郡當塗縣化城
寺大鍾者量函千盈蓋邑宰李公之所剏也公名有
則系玄元之英蕤茂列聖之天枝生于貴族貴而秀
出少蘊才略壯而有成西逾流沙立功絕域帝疇乎
厥庸始學古從政歷宰潔白聲聞于天天書褒榮輝
之簡牘稽首三復子孫其傳天寶之初鳴琴此邦不
言而治日計之無近功歲計之有大利物不知化潛

臻小康神明其道越不可尚方入于禪闕覩天宮崢
嶸聞鍾聲瑣屑乃謂諸龍象曰盍不建大法鼓樹之
層臺使羣孽六時有所歸仰不亦美乎於是發一言
以先覺舉百里而感應秋毫不挫人多子來銅崇朝
而山積工不日而雲會乃採鳧氏撰鳴鍾火天地之
爐扇陰陽之炭回祿奮怒飛廉震驚金精轉滂以融
熠銅液星縈而璀璨光噴日道氣敵天維紅雲點于
太清紫烟矗於遙海烜赫宇宙功侔鬼神瑩而察之
可駭人也爾其龍質炳發虎形躩踞縻金索以上縹
懸寶樓而迭擊傍振萬壑高聞九天聲動山以隱隱
響奔雷而闐闐赦湯鑊於幽途息劍輪於苦海景福
盼蜚被于人天非李公好謀而成弘濟羣有孰能與
於此乎丞尉等並衣冠之龜龍人物之標準大雅君
子同僚盡心聞善賈勇贊成厥美寺主昇潮開心古
容英骨秀氣灑落毫素謙柔笑言海受水而皆納鏡
無形而不燭直道妙用乃如是然常虛懷忘情潔已

利物是人行空寂不動見如來有若上座靈隱都維
那則舒名僧日暉蘊虛常因調護賢哉六開士普聞
八萬法深入禪慧精修律儀將博我以文章求我以
述作功德大海酌而難名遂與六曹豪吏姑孰賢老
乃緇乃黃鳧趨梵庭請楊宰君之鴻美白昔忝侍從
備于詞臣承德音敢闕清風之頌其辭曰雄雄鴻鍾
砰隱天雷鼓霆擊警大千含號烜赫聲無邊摧懼魑
魅招靈仙傍拯六道極九泉劒輪輟苦期息肩湯鑊
猛火停熾燃愷悌賢宰人父母興功利物信有久德
方金鍾永不朽

化城寺

湯顯祖

滄波雲氣結樓臺采石金陵相映開一朶青蓮留夜
宿諸天水月照人來

途經李翰林墓

許渾

氣逸何人識才高舉世疑禰生狂善賦陶令醉能詩
碧水鱸魚怨青山鵬鳥悲至今孤塚在荆棘楚江滑

經李翰林墓

項斯

夜郎歸未老醉死此江邊
葬闕官家禮詩殘樂府篇
遊魂應到蜀小碣豈旌賢
身歿猶何罪遺墳野火燠

經李翰林墓

殷文珪

詩中日月酒中仙平地雄飛上九天
身謫蓬萊金籍外寶裝方丈玉堂前
虎靴醉索將軍脫鴻筆悲無令
子傳十字遺碑三尺墓只應吟客弔秋烟

李白墓

曾鞏

世間遺草三千首林下荒墳二百年
信矣輝光爭日月依然精爽動山川
曾無近屬持門戶空有鄉人拂
几筵顧我自慚才力薄欲將何物吊前賢

太白墓

晁補之

客星一點太微旁談笑青蠅玉失光
載酒五湖狂到死只今天地不能藏

弔李翰林墓

陸游

飲似長鯨快吸川思如渴驥勇奔泉
客從縣令初何

有醉忤將軍亦偶然駿馬名姬如昨日斷碑喬木不知年浮生今古同歸此回首桓公亦故阡

李白墓

吳淵

翠峰埋骨處髣髴見英靈素月詩魂遠清泉酒面醒
一時蹤跡因千古姓名聲疇昔流離處無人爲眼青

經采石望太白墓

劉永之

采石多名酒苔磯水自香昔年李太白于此屢銜觴
失意長安道狂歌入楚邦雲烟揮翰墨宮錦製衣裳
醉骨埋青嶂荒祠帶夕陽余亦忘機者翩然辭帝鄉
田園蕭水上井邑葛山旁去去隨鷗鳥烟波正渺茫

采石太白墓

孫賁

冠履何年墮世塵先生元是謫仙人春雲彩筆驚飛
燕暮雨滄江泣石麟牢落清名元不歿衰遲大雅竟
難陳翛然我亦狂吟客思殺風流賀季真

青山宿李白墓下阻水

梅鼎祚

舊識名賢墓停橈載拜難寒蕪迷故徑秋雨漲高湍

辭賦真何益雲山此鬱盤只應霄漢上長作酒星看
弔水部賈員外

鄭谷

八韻與五字俱爲時所先幽魂應自慰李白墓相連

望夫山

入圖畫

李白

顛望臨碧空怨情感離別江草不知愁巖花但爭發
雲山萬重隔音信千里絕春去復秋來相思幾時歇

望夫山

梅堯臣

征骨化爲塵柔肌化爲石高山共蒼蒼臨水望脉脉
青雲卷爲髮缺月低照額千古遺恨深終不見車軌

望夫山

賀鑄

亭亭思歸石下閱幾人代蕩子不歸來山椒久相待
微雲護髮彩初月輝蛾黛秋雨疊苔衣春風舞羅帶
宛然姑射子矯首塵冥外陳迹遂無窮佳期從莫再
脫如魯秋氏要結桑中愛玉質委泥沙悠悠復何在

望夫山

陳造

亭亭碧山椒依約凝黛立何年蕩子婦登此望行役

君行斷音信妾恨無終極堅誠不磨滅化作山上石
烟悲復雲慘髣髴見精魄野花徒自好江月爲誰白
亦知江南與江北紅樓無處無傾國妾身爲石良不
惜君心爲石那可得

石婦操

并引

楊維禎

石婦卽望夫石也在處有之詩人悲其志與精衛
同不必問其主名也予爲詞補夫琴操云

峨峨孤竹岡上有石魯魯山夫折山華歲歲山頭歌
石婦行人幾時歸東海山頭有時聚行人歸啼石柱
石婦岑岑化黃土

望夫山

陳振

望夫夫不還貞心化爲石獨立天地間千年有遺跡
江草自春秋江聲自朝夕長對雙眉顰莫盡相思臆
望夫山四首

湯賓尹

妾心甘化石石意更堅貞待得夫歸日還應石化人
江中水日流江上石常在石應有泐時妾心終不改

有情妾化身無情石不語君若有情時認取舊時婦
望夫夫不歸夫歸悔何及寄語閨中人相教慎離別

慈姥磯

何遜

暮烟起遙岼斜日照安流一同心賞夕暫解去鄉憂
野岼平沙合連山遠霧浮客悲不自已江上望歸舟

詠慈姥

吳均

根為石所蟠枝為風所碎賴我有貞心終凌細草輩

慈姥山石崖上竹鞭

梅堯臣

江水浸石壁峭直無鳥蹤穴垂青竹根瘦螭愁作龍
霹靂雨脚入濕點莓苔封世人不得用八馬今垂慵

慈姥磯下

前人

蘆汀泱泱外露斂見孤嶂行舟每出觀漸近已殊狀
傍來任飲牛正去忽側益水壑陰若春野鳥時與翔
且待風色廻出口始浩蕩

晚泊慈姥磯下

陸游

山斷峭崖立江空翠靄生漫多來往客不盡古今情

月碎知流急風高覺笛清兒曹笑老子不睡待潮平
慈姥磯頭月纖纖照酒杯素秋風露重久客鬢毛催
宿鳥驚還定飛螢闔復開平生四方志老去轉悠哉
慈姥望夫二磯
徐俯
慈姥磯頭秋雨聲望夫山下暮潮生離鸞只說閨中
怨舐犢誰知目下情

慈姥竹

陳振

江上慈姥山地與蟹谷匹產竹製簫管清和中音律

伶倫去已遠叢生老巖窟採之獻明廷當有鳳皇出

登慈姥磯題石

梅守箕

曰余翼爾升於高危禽龍其梯佩流珥險而偃足嘻
疑久旅殉塗登望厥偕神耦智卑時唯邁而穴石自
風遙波生衣淵鬼張魄怒雲駭頽心之戚矣日月代
賓惟我有懷流水盈盈謂我不懷以天爲正

凌歊臺

入圖書

李白

曠望登古臺臺高極人目疊嶂列遠空雜花間平陸

閒雲入窗牖野翠生松竹欲覽碑上文苔侵豈堪讀

凌歊臺

許渾

宋祖凌歊樂未回三千歌舞宿層臺湘潭雲盡曉山
出巴峽雪消春水來行殿有基荒薺合寢園無主野
棠開百年便作萬年計巖畔古碑生綠苔

凌歊臺

游酢

今古豪華一夢回劉公遺跡有荒臺青山空野雙門
壯白浪排雲萬馬來澗澗松篁生夜響年年桃李爲
春開更尋小杜題名處玉筍銀鈎昏蘚苔

凌歊臺

李孝光

宋家天子遊南國紅粉三千臺百尺歌鍾激浪楚日
白簾櫳綠樹湘雲碧凌歊高宴金輿來侍臣狎笑朱
顏開臺城宮扉鎖花柳寄奴玉障生塵埃昏昏醉夢
春風几不顧江東數千里酒罷歌闌帝業隳青山空
映當塗水

謝公池

鍾鼎

藍輿又到白雲峰古寺猶存六代松鑿石天開苔繡
佛畊烟花落鳥啼鐘平疇禾黍欣無恙山閣琴樽興
轉濃極目三吳頻入望江聲日夜吼蛟龍

天門山

李白

迴出江山上雙峰自相對岸映松色寒石分浪花碎
參差遠天際縹緲晴霞外落日舟去遙迴首沉青靄

望天門山

人圖畫

前人

天門中斷楚江開碧水東流至北迴兩岬青山相對
出孤帆一片日邊來

天門山銘

前人

梁山博望關扃楚濱夾據洪流實爲吳津兩崖錯落
如鯨張鱗惟海有若惟川有神牛渚怪物日圍車輪
光射島嶼氣凌星辰卷沙揚濤瀾馬殺人國泰呈瑞
時訛返珍開則九江納錫閉則五嶽飛塵天險之地
無德匪親

天門山

程鉅夫

萬里瀰漫地天門據要衝乾坤大開闢江漢此朝宗
往事空多壘千年只二峰舟人亦癡絕遙認兩眉濃

天門山

王廷相

天門峭雙闕翠律迥相對洞劈華陽口石裂方壺背
寒雲莽空濶秋潮浩奔逝我行屬風波狂起龍飛瀨
三山渺何許孤舟日搖曳空懷招隱篇不逢采真會
傲吏恒乖俗逸韻故輕勢鬱鬱佳山水平生有深契
騎箕列星遙從龍帝閣翳方將擬抱關何日期歸棹

天門山

王世貞

天門高不極瞻眺豁神情一水中流劃雙峰對削成
雲霞依島嶼日月避崢嶸疏鑿何年事還疑闢五丁
舟滯梁山登天門絕頂

吳伯與

山容如壓帽天隱路疑深門到千層浪巖畱百丈陰
葉高風易下江濶日全沉何處雲泉少徒多未了心

梁山阻風泊大信河韻

管訥

樓船遡流上高帆阻長風大江浩無際一氣何鴻濛

回望天門山峩峩相長雄洪濤走其下屹立西與東
不有浮海嘆豈無濟川功大鵬度寥廓斥鷃守卑叢
物理固有定世事徒匆匆張燈啓華筵一笑盃酒中

過東梁山西梁山

周倫

東西萬古石梁存潮落潮生幾處痕一水中流通鷁
棹兩山相向過龍門樓臺依約高藏寺烟樹迷茫下
有村風便未登聊問俗詩成祇自引壺尊

遊白紵山

入圖畫

王安石

白紵衆山頂江湖下縈帶浮雲卷晴明可見九洲外
肩輿上寒空置酒故人會峰巒張錦繡艸木發虛籟
登臨信地險俯仰知天大留歡薄日晚起視飛鳥背
殘年苦局束往事興難慨歌舞不可求桓公井空在

首夏遊白紵山

郭奎

宿雨忽開霽山光澹碧滋歸雲度大澤流水積華池
氣屬清和景歌翻白紵辭桓公今已矣人事復何爲

白紵山

張伯玉

天天白紵歌會此發清唱疑是姑蘇臺移來楚江上
瑤音邈已久翠帶誰相向謾動古今愁臨風一惆悵
同劉觀欵泛舟登白紵
丁孕乾

柳花飛暮麥乘秋峰轉高低一水周詞曲漸成山姓
字池臺猶寫晉風流鶯當前路聞芳語酒附歸舟得
緩游官似僧閒僧似客載將春去問浮丘

桓公井

入圖畫

李白

桓公名已古廢井曾未渴石甃冷蒼苔寒泉湛孤月
秋來桐暫落春至桃還發路遠人罕窺誰能見清徹

桓公井

陳振

井水本湛然人也一沾汗遂令千載名滌去還如故
荒甃翳春苔寒蟲泣秋雨我詩闢奸雄爲泄泉石怒

景山記

馬之駿

景山一名月盤山土人稱爲雷峰以上有雷神殿故
出城遵隄行三里過小橋萬松倚崖立下皆殞宮霧
屯濤沸鬼欲晝出稍上徑漸高輿中覺膝來擊頷逕

太平三書 卷之二
盡得亭列石數十方悉作踞獅眠虎狀稍折而下亭
之旁一洞僅受人更上尋嶺首有亭冠焉西望見江
從天際白下視姑溪西走縈縮如帶遠山環睨淡冶
韶秀獨謝家青山磅礴峻岫高入雲漢如偉人立羣
稚中其魄固足籠蓋此郡也余凡兩遊茲山一赴李
郡伯季重招一赴林陽仲明府招最後看落日日如
銜兩天門中時積陰乍解駁金蛇昱射煜若在鎗之
金餘光掠溪柘衫赭綺不可爲色客中之快觀也

寓姑孰李季重郡伯招同胡助之司李登景山

漫賦

前人

烏藤拚了客中緣識面江山此最先石瘦自憐冬有
格烟高轉覺野無邊孤帆碧浪寒逾細古木丹崖晚
竝懸聚散含香懷舊地却看鵬鷺兩翛然
遊人有主趣方成官暇多君具野情簿領盡添山掌
故嘯歌都入樹音聲觸簾雲忽如鱗起倚檻江纔一
髮行但以并兒誇從吏咲他山簡太憨生

九日龍山飲

李白

九日龍山飲黃花咲逐臣醉看風落帽舞愛月留人
秋日陪集賢學士趙公敬夫憇龍山玄真宮

貢奎

山轉疑無地人家近隔村野田秋穫盛岡路晚行喧
川淨雲生石溪平水到門偶尋高士隱相見遂忘言

靈墟山

入圖書

李白

丁令辭人世拂衣向仙路伏鍊九丹成方隨五雲去

松蘿蔽幽洞桃杏深隱處不知曾化鶴遼海歸幾度

靈墟山

王思任

予遊虎林曾訪野鶴紫陽山洞瞥見眉顙令人癡死
頃令姑孰走薛鎮授餐官櫛過昇仙庵道士向余言
竹龍白鶴之事甚奇而兩壁間慙者謏者詠者幾充
棟矣予曰丁令威尸解則上仙品則下八素列紀自
能勝之况無生之學哉但其城表遺音令聞者愴然
悲心而惘然如有喪也以人歎人以世閱世余安得

無言畱道士乎因作靈墟歌歌曰靈墟山下水灣洄
橫橋卧石剝蘚碑中封丹釜疑培堆望有煙兮捫無
灰何年涇令騎龍來伐毛易髓存玄胎青精玉斧同
化裁一旦九還走玫瑰白日陸沉光隱回飛到吳峰
紫陽臺東望故鄉起徘徊高脚踈節復毳毼其羽可
儀其鳴哀聽之憤愆淚墜顛神奇臭腐刻相催仙人
鬼子共黃埃只有生死關難開胡爲血眼愁肉坏丁
令丁令安在哉水潺湲兮山崔嵬我姑酌彼黃金壘
在却怪當年去復歸

靈墟山

郭紹儀

借榻高真漫掩扉湖山展卷夢魂飛不知野鶴今何

橫望山

入圖畫

楊傑

陶家舊宅寄山坳七百年前此結茆太尉雙碑遺字
晦先生五井暗泉交野僧拂石爲牀坐童子穿冰作
磬敲巖下清音誰解聽古聲長在老松稍

九井山

王安石

沿崖涉澗三十里高下犖角無人耕捫蘿挽葛到巖
趾仰見吹瀉何崢嶸

卜居葛仙山寄懷諸游好二章 孫旭

不待歌叢桂青山隱自招游踪甘鹿豕生計狎漁樵
林響秋飛葉河平晚上潮于于疎散癖永矢遠煩囂
抱犢常眠月驅雞漫入雲浩可空谷響長嘯半天聞
瑤草春方拾胡麻日可芸白應安蹇劣那敢避明君

丹陽湖

謝朓

積水照頰霞高臺望歸翼平原周遠近連汀見紆直
葳蕤向春秀芸黃其春色薄暮傷佳人嬋娟復何極

丹陽湖

李白

湖與元氣連風波浩難止天外賈客歸雲間片帆起
龜遊蓮葉上鳥宿蘆花裏少女棹歸舟歌聲逐流水

林塘懷友

王勃

芳屏畫春草仙杼織朝霞何如山水路對面卽飛花
宿磯上港

梅堯臣

太平三書 卷之十一
夜深風浪息月正在南斗遠水生白烟疎螢出荒藪
照蟹屢蕪薪張魚未發笱獨能怜野客游宦意何有
題橫江館
杜牧
孫家兄弟昔龍驤馳騁功名帝業王至此江山誰是
主苔磯空屬釣魚郎

太平州學記

王安石

太平州新學在于城東南治平三年司農少卿建安
李侯仲卿所作侯之爲州也寬而有制靜而有謀故
不大罰戮而州旣治于是大姓相勸出錢造侯之庭
願興學以稱侯意侯爲相地遷之爲屋若干間爲防
環之以待水患而爲田若干頃以食學者自門徂堂
闔壯麗密而所以祭養之器備具蓋往來之人皆莫
知其經始而特見其成旣成矣侯罷去州人善侯無
窮也乃來求文以識其時嗟乎學之不可以已也久
矣世之爲吏者或不足以知此而侯知以爲先又能
不費財傷民而使其自勸以成之豈不賢哉然世之

為士者知學矣而或不知所以學故予於其求文而因以告焉蓋繼道莫如善守善莫如仁仁之施自父子始積善充之以至於聖而不可知之謂神推仁而上之以至於聖人之與天道此學者之所當以為事也昔之造書者實告之矣有聞于上無聞于下有見于初無見于終此道之所以散百家之所以成學者之所以弊也學乎學乎將以一天下之學者至于無弊而止遊于斯饜于斯而余說之不知則是美食逸居而已者李侯之為是也豈為士大夫美食逸居而已哉

太平府修城記

王世貞

太平古金陵支邑也後稍進為郡與金陵俱倚天塹而固自金陵之為帝者都而太平之人民田土兵衛不能當其十之一然寔據其上遊為之儲胥禦圍而制其命如古所謂左馮翊者當天之割而且合北不得太平不可以窺金陵南不得太平金陵不可以

守夫以太平之重若此而自明興二百餘年以來守
土者安於平治之形而不暇省其城低庫使弱者憑
二尋之衿不必羽而登也所甃僅表而毋及裏陜不
容軌土惡善潰不必淫霖而隳也萬曆辛壬間莆田
林侯來爲守恤民隱搜吏弊興士風諸所以稱塞守
狀良悉顧以時周行睥睨間而憂之謂卒有不虞如
柙積何卽不穀狃前人苟簡及瓜以俟後之君子彼
復狃我將縣官何所賴焉而會治兵使者程公按部

來與林侯筴合乃上侯議督撫中丞孫公江防中丞
呂公巡按侍御陳公得報可爲具疏聞之上下大司
馬大司徒議報可下中丞侍御已復下程公程公下
侯所與倅陳某當塗令楊某規度所增築爲堞者三
千七百六十而羸其崇二丈三赤而羸裏坦之崇一
丈六赤而羸厚一丈七赤而羸週遭爲丈一千六百
六十而羸所改飾爲麗譙者五爲津關者三爲戍廬
者三百而羸計直爲中金一萬七千七百九十而縮

謀之帑不足則請諸郡減卒直八千四百四十餘金爲之幹不足則陳公以千金益之程公再以千金益之孫公以五百金益之又不足林侯與楊令復率贖鍰千金益之又不足則爲勇爵賜級以勸郡人某某凡三千餘金益之林侯乃率厲其屬與士卒分功於版築間蓋不閱歲而城成以書屬余俾紀其事余故嘗臆史所稱請城洛陽與大梁者或以天子之守守在四夷諸侯之守守在四隣爲說而譏其示人弱竊

以爲不然夫地利不如人和雖賢者記之然至夫子之系易未嘗不曰王公設險以守其國未已而又曰重門擊柝以待暴客蓋取諸豫夫以大聖人而當取卦尚象時夫豈有暴客之足虞而制爲重門擊柝彼所以待衰預變之計周且遠也故曰需有衣袽終日戒又曰其亡其亡繫于苞桑若世宗朝寧不亦重熙累洽哉一旦島寇卒起而大江以南佳麗之地其無城者城而庫且薄者悉其子女玉帛以餒寇三里之

垣苟不至墮老弱荷檐而立乘高下瞰賊目飽氣盡
而走耳城之不可以已也如是今幸臺察監司諸大
夫與林侯合筴而固太平不至大損縣官帑雖曰齊
民之力而善用之說以先民民忘其勞咸相率赴事
不歲而成百歲之偉功且因以爲金陵上游衛其事
豈淺小哉雖然所謂有形險也無形之險在黔首心
林侯固已饒得之矣請以是風倅令及後之君子毋
忽諸則永永有賴哉

休沐重還丹陽道中

謝朓

薄遊第從告思間願罷歸還叩歌賦似休汝車騎非
灞池不可別伊川難重違汀葭稍靡靡江蓼復依依
田鴿遠相叫沙鶉忽爭飛雲端楚山見林表吳岫微
試與征徒望鄉淚盡沾衣賴此盈樽酌含景望芳菲
問我勞何事霑沐仰清徽志狹輕軒冕恩甚戀閨闈
歲華春有酒初服偃郊扉

送元洗還丹陽舊業

郎士元

已知成傲吏復見改朝衣應向丹陽郭秋山獨掩扉
草堂連古寺江日動晴暉一別滄洲遠蘭撓幾歲歸

洞齋

洪邁

住眠起清坐目送孤雲飛婆娑此室中氲氲爐烟氛
長邊霜千丈羞說翰墨勲桃李明未了明粧羅縞裙
庭竹雖不多照屏友墨君俗塵斲已盡底用成風斤

姑孰官舍

許渾

草生官舍似閒居雪照南窗滿素書貧後始知爲吏
拙病來還喜識人疎青雲豈有歸梁燕濁水應無避
釣魚不待秋風便歸去紫陽山下是吾廬

過當塗縣

韋莊

客過當塗縣停車訪舊遊謝公山有墅李白酒無樓
采石華空發烏江水自流夕陽誰共感寒露立汀洲
泛小舟姑孰溪口

陸游

姑溪綠可染小艇追晚涼棹進破樹影波動搖星芒
荻深漁火明風遠水草香尚想錦袍公醉眼隘八荒

坡陁青山冢斷碣卧道旁悵望不可逢乘雲遊帝鄉

姑孰溪

陳振

清溪何迢迢奔流繞城曲人家樓閣臨賈客帆檣宿
雙虹波上橫千樹峰邊綠觀風沂空明悠悠濯心目

同寮友泛酌姑溪

鍾鼎

姑溪千尺水縈溯大江通估客停風纜居人掛釣筒
遠山蒼翠合隔岸蓼花紅此日同高詠依稀在剡中

泊姑孰界

梅鼎祚

更作江干宿飛樓托水禽樵風驚斷岫漁火出疎林
懷土頻勞夢逢人漸改音天涯楊柳樹一一繫秋心

姑孰道中

周瑛

采石孤帆落青山一騎歸朔風吹短髮疎雨濕征衣
野火漁歸市林鐘衲掩扉可憐江上雁入夜更南飛

瑞竹堂

陳裕

昔年奉使此經過老衲相迎雅意多今日重來人不
見白雲黃葉滿山坡

太平州作二首

黃庭堅

歐靚腰支柳一渦小梅催拍大梅歌舞餘片片梨花
雨柰此當塗風月何

千古人心指下傳楊姝煙月過年年不知心向誰邊
切彈盡松風欲斷絃

題太平別業

謝士元

吾道重卷舒所屬皆真樂建溪有閒翁謝事老林壑
結廬面一丘幽深更磅礴綠水浮前榮青山連近郭

齋居竹爲床野服冠用籜遺後多積書却老剩栽藥
先春理鋤耰課僕事耕作秋來三逕黃風葩間霜萼
看雲還杖藜棗熟或自剝鄰叟時經過忘情共歡謔
野興不自持携琴領孤鶴有時發商歌聞者咸驚愕
何人知我心我心無愧怍萬古此江山因君愈恢廓
老我鞅掌懷卜鄰敢忘酌撫卷憶鄉山千重雲漠漠

太平

林廷模

太平溪上客舟過坐聽滄浪醉裏歌無數落花隨水

去前山風雨夜來多



